



1

MOCIÓN SOBRE OS RECORTES DE SERVIZOS SANITARIOS NOS HOSPITAIS DA PROVINCIA DE OURENSE

O Irixe, a 12 de decembro de 2019.

Iago Fariñas Valiña, Voceiro do Grupo Municipal Socialista do Concello de O Irixe, en base ó disposto nos artigos 91.4 e 97.3 do Regulamento de Organización, Funcionamento e Réxime Xurídico das Entidades Locais e demais normativa de aplicación, presenta diante do Pleno da Corporación para a súa consideración esta **MOCIÓN SOBRE OS RECORTES DE SERVIZOS SANITARIOS NOS HOSPITAIS DA PROVINCIA DE OURENSE**, en base á seguinte

EXPOSICIÓN DE MOTIVOS

PRIMEIRA.- Que Ourense está a sufrir un importante ataque contra os seus servizos públicos máis básicos, con importantes recortes, amputacións e rebaixas que están a suprimir ou a pór en perigo a prestación da atención sanitaria máis básica, en condicións óptimas de calidade, seguridade e igualdade, por culpa de decisións políticas e gremiais que impedirán, a parte da nosa veciñanza, vivir nas mesmas condicións das que disfrutan o resto de galegos e galegas.

SEGUNDA.- Que a última decisión do goberno de Alberto Núñez Feijóo, que acordou pechar o paridoiro e o servizo de pediatría de garda do hospital de Verín, condena o futuro das comarcas do sur e do oriente da provincia. Para fixar poboación, unha das principais preocupacións da sociedade actual, é imprescindible manter unha axeitada asistencia sanitaria neste tipo de servizos básicos, xa que non estamos a falar de *luxos asiáticos* ou de especialidades pouco habituais que requiran de recursos concretos e estraños. É un servizo que afecta a todas as familias. Estamos a falar de bebés, de nenos e nenas e de mulleres.

TERCEIRA.- Que ¿Por que se incrementou un 700 % a taxa de traslados de neonatos nados en Verín ata o Complexo Hospitalario Universitario de Ourense (CHUO), nos meses previos ó peche? ¿Por que un neno accidentado deberá esperar nas urxencias de Verín a que un pediatra chegue desde Ourense ou desde outra provincia para trasladalo, horas despois, ata o CHUO?

CUARTA.- Que ¿Por que o goberno de Núñez Feijóo pecha o paridoiro de Verín e o seu servizo de pediatría continuado, cando o informe ministerial no que se basean para ese acordo, tamén determina que ese número mínimo de partos non é aplicable “se hai razóns de tempos de desprazamento ou accesibilidade”, algo evidente neste caso? Desde algúns municipios das comarcas de Viana e Monterrei, os desprazamentos superarán unha hora de traxecto. E, sobre todo, ¿por que o goberno de Núñez Feijóo pecha agora estes servizos cando esa área sanitaria nunca alcanzou nin un terzo dos partos que esgrime a Xunta para a clausura?



2

QUINTA.- Que ¿Por que desde o decreto 168/2010 se foron minguando a calidade e a cantidade dos servizos prestados no hospital do Barco? ¿Por que non se cubren de forma deliberada as prazas de especialistas de rehabilitación, uroloxía, dermatoloxía ou medicina preventiva no centro valdeorrés? ¿Por que se manteñen servizos básicos en precario como pediatría, que só ten un especialista fronte ós tres que tiña antes, ou cirurxía, que contaba con catro especialistas e só quedan dous?

SEXTA.- Que así mesmo, o Sergas está a aplicar dede hai anos unha política de servizos mínimos continuados nos centros de atención primaria da provincia, onde traballadores e veciñanza padecen faltas de persoal e de servizos. Os ambulatorios do rural cada vez teñen menor dotación médica, de enfermeira e doutras especialidades moi necesarias no día a día.

SEPTIMA.- Que os problemas que xa sofren os habitantes das comarcas ás que prestan servizo os hospitais de Verín e O Barco, en palabras do propio xerente da área sanitaria integrada, Félix Rubial, tamén afectarán ós servizos na terceira cidade de Galicia, a causa destas decisións políticas de carácter mercantilista. Rubial xa anunciou que pretende converter o Complexo Hospitalario Universitario de Ourense nunha mera sucursal de baixo custe do Hospital Álvaro Cunqueiro, porque “de seguir a tendencia actual, probablemente nos obrigue nuns anos a ter que derivar partos en situacións complexas ao noso centro de referencia, que é Vigo”.

OITAVA.- Que estas verbas son inadmisibles en boca dun xestor designado politicamente, que debería defender os servizos públicos de Ourense, e mais nun caso tan sensible como é o da sanidade pública dunha provincia historicamente marxinada polos orzamentos do goberno galego. A Xunta hai anos que decidiu focalizar a meirande parte dos seus recursos nos hospitais das dúas maiores cidades galegas –Vigo e A Coruña– e, ó mesmo tempo, crear un novo hospital de referencia en Santiago de Compostela, un centro que ata hai uns anos era un centro máis da rede galega e no que agora pretenden centralizar case todo.

NOVENA.- Que ó marxe do atraso nos grandes investimentos, hai anos que o CHUO tamén se está a ver afectado por decisións políticas que recortan e suprimen servizos básicos. Os cativos e as familias da provincia viron recortado ata case a súa desaparición o servizo de cirurxía pediátrica e as urxencias pediátricas. A día de hoxe complexo hospitalario segue sen prestar servizo de hemodinámica as 24 horas os sete días da semana, o que provoca unha maior mortalidade por infarto en comparación con outras cidades e provincias. Incluso Lugo xa ten este servizo de forma continuada. A falta de investimentos en tecnoloxía e novos servizos é unha constante, mentres noutras provincias as melloras son habituais.



3

DECIMA.- Que este carrusel de pésimas decisións políticas están a escribir unha crónica negra para Ourense e son unha estocada para o noso presente e o noso futuro, que só se poderá revertir se todos os representantes políticos e forzas públicas se unen contra esta afronta.

Que por todo o exposto e para contribuir a defensa e mantemento da sanidade pública o Grupo Municipal Socialista do Concello de O Irixo presenta para a súa consideración e aceptación polo Pleno Municipal a seguinte **MOCIÓN** instando ó Concello a:

1º- Solicitar á Consellería de Sanidade que reabra, manteña e mellore os servizos que se viñan prestando no Hospital Comarcal de Verín, para garantir a calidade asistencial da veciñanza, nomeadamente do servizo de paridoiro.

2º- Solicitar á Consellería de Sanidade que repoña e mellore os servizos que se viñan prestando no Hospital Comarcal de Valdeorras, para garantir a calidade asistencial da veciñanza.

3º- Solicitar á Consellería de Sanidade que dote e mellore ós centros de atención primaria da provincia, dos recursos humanos e materiais que precisan para garantir unha sanidade de calidade no rural de Ourense.

4º- Instar á Deputación de Ourense a que aporte á Xunta de Galicia os fondos necesarios para reabrir e manter o paridoiro de Verín, no caso de que non se rectifique a decisión, debido ao publicitado compromiso do goberno provincial con este problema; á súa boa situación financeira; e ao mandato legal que ten a institución ó ser o seu obxectivo prioritario prestar servizos ós pequenos concellos, mediante plans, programas e axudas para as súas necesidades.

5º- Reprobar ó conselleiro de Sanidade, Jesús Vázquez Almuíña, por ser o responsable directo do peche de paridoiro de Verín, e dos recortes aplicados no hospitais comarcais do Barco de Valdeorras e Verín e no Complexo Hospitalario Universitario de Ourense; e reprobar ó presidente da Xunta, Alberto Núñez Feijóo, por refrendar estas decisións.

6º- Instar á Consellería de Sanidade ao cese inmediato de Félix Rubial Bernárdez, xerente da Estrutura Organizativa de Xestión Integrada (EOXI) por poñer en dúbida a continuade do servizo de partos no Complexo Hospitalario Universitario de Ourense, e polos recortes aplicados en todos os hospitais da provincia.

Asdo.: Iago Fariñas Valiña
Voceiro do Grupo Municipal Socialista

SR. ALCALDE-PRESIDENTE DA CORPORACIÓN MUNICIPAL DE O IRIXO